

**TI Consëi nù dla Uniun dles Èles** él sègn :

**Renate** Valentin da Castalta, **Lucia** Valentin de Val, **Erna** Irsara da Coz, **Roberta** Rubatscher da Pedraces, **Martina** Pitscheider da Ruac y **Gabi** Irsara da Castalta che é gnüda pomez y che tól ite l'post de Rosmarie Irsara.

**L'Diozesaninstitut für den Unterhalt des Klerus (DIUK)** präia ince chësc ann de n contribut por mantegní nòsc proi. Vigni spënorà, ince la plö picera, é de aiüt y pó gní trata jö dal davëgn sotmetü ala cuta. Informaziuns plö avisa ciafëise te calonia o al nr. 0471/306300.

**Le Sorvisc ai Jogn** lascia alsavëi che l'ufize a Picolin é stlüt dal lönesc 2 de novëmber al vëndres 6 de novëmber.

**Referat:** cun dr. Gregorio Rungger dal titul „*Le bot al ce - ictus*“ en mertesc 03.11.2015 dales 20.00 te Ciasa de Palsa a San Martin de Tor. Al gnará baié sura i segnai dl dé le bot al ce, sciöche paralises o desturbs dl baié y sura les terapies y la prevenziun.

**De dla Caritas – Racoüda de quant** sön plaza dl implant Piz La Ila gnarál ince chësc ann ciarié le quant dla Caritas. I paisc da Calfosch, Corvara, La Ila, San Ciascian y Badia é peria da porté dailó i sac dla Caritas che pó gni dá jö dal **vëindres ai 6 de novëmber dales 16:00 inant cina les 10:00 dla sabeda ai 7 de novëmber**. Sce al vëgn adoré sac foscé, präibel **nia i fá plëins**. Präibel tignisse al orar che é scrit dant.

**KVW - Guant por i profugs:** dlungia la racoiüda dl guant en general dla Caritas fej le KVW dl Comun de Badia na racoiüda de **quant da d'invern por i profugs**, por pici y gragn. Al vëgn chirí adöm **iaches y felpes, ciüries, manëces y sciarpes** (nët y en bëgnester) a La Ila Alta te Ciasa dles Uniuns/Stödafüch (alta ite) dal 02.11.2015 ai 07.11.2015 (döt l'de). Por informaziuns podëis cherdé sö le numer 333/6769105.

**Info dal ambulatore dl dotur:** al vëgn indó fat “spritzen” cuntra les coies: lünesc–mercui–jöbia dales 08:30 ales 09:30 tl ambulatore a Pedraces.



En lünesc, ai 02.11.2015 complësc **Maria Anvidalfarei Palumbo** da Ciaminades la bela eté de **90** agn. L'Senioreclub y düta la Comunità ti aoda düte l'bun, sanité y benedisciun de Dì.



**Usc dla Cüra** **BADIA**

Tel./Fax 0471 839571 - E-Mail: [parrocchiabadia@libero.it](mailto:parrocchiabadia@libero.it) - [www.valbadiaonline.it](http://www.valbadiaonline.it)

Nr. 49

Edema: 01.11.– 08.11.2015

## Gnissant

*Te Gejú Crist se müda vigní  
tëma te ligrëza,  
Vigní disperaziun te speranza,  
Vigní mort te víta.*



### Vangele dla Domënia che vëgn - XXXII° ann „B“

(Merc 12,38-44)

Te chël tëmp ti á Gejú dit ala gran meja de jënt ch'al istruí: Stravardësse dai studiá dla lege! Ai va ion cun guanc lunc incërch, se lascia ion saludé sön strada y sön plaza, y oress tó ite i pröms scagns tla sinagoga y avëi pro vigni past da festa i poscé d'onur. Ales vëdues ti toli sües ciases y s'astilan sanc diji oraziuns dër lunges. Mo cotan plü düra sará la sentënza che ti aspeta. Canche Gejú á n iade senté defrunt ala cassa dal'oferta, ciarâtl pro coche la jënt sciurâ scioldi tla cassa. Al n'ê tröc de ric che gnô y che dê tröp. Spo él ince gnü na püra vëdua y á sciuré ite döes de pices monëdes. Al á cherdé pomez sü discepui y á dit: Amen, i ves diji: Chësta püra vëdua á sciuré tla cassa dal'oferta deplü co düc i atrí. Deache düc á ma sciuré ite val' ch'ai á dessurora, mo chësta ëra, che á apëna da vire, ara á dé döt ci ch'ara á, döt so avëi por vire.



# FUNZIUNS SACRES

## 01.11. DOMÈNIA – FESTA de GNISSANT dl ANN / B

- 10.00 Mëssa ciantada solena por la Comunità  
14.00 Öspi de Gniissant – Funziun di morc y vijita te curta  
18.00 †ti Antonia y Hermann Nagler - aniversar  
†ti Zisca y Vijo Canins – aniversar  
†ti Alfarei de Andrac

## 02.11. Lünesc – DE dles ANIMES / Comemoraziun di defunc

- 09.00 Requiem por düc i morc dla Cüra y vijita ala curta  
†to Otto Clement  
†to Siegfried Winkler  
†to Paul Pizzinini de Crafunara

## 03.11. Mertesc - degüna mëssa

## 04.11. Mercui - *S. Carlo Borromeo*

- 07.30 †ti Paul y Emilia Pitscheider  
†to Serafino Ploner  
†ti de Lois y Annelies Valentin

## 05.11. Jöbia

- 19.30 †ta Erna Dapunt – aniversar  
†ti Paul, Afra y Rosina Declara  
†ti Paulin y Rita Irsara

## 06.11. Vëndres – *S. Linert / Prüm vëndres dl mëis*

- 07.30 †to Albert Piccolruaz - aniversar  
†ti Gottfried y Zilia Nagler - aniversar  
†to Antonio Palumbo


## 07.11. Sabeda

- 16.00 S.Mëssa a Oies

## 08.11. XXXII.DOMÈNIA dl Ann B – De de rengraziamënt dla racoiüda

### FESTA de S. LINERT

- 09.00 Mëssa ciantada solena en onur de S. Linert  
10.45 *Sfilada cun i ciavai y benedisciun*  
18.00 †to Tone Pitscheider - aniversar  
†ti Rosina y Franz Irsara - aniversar  
†ta Gusta Pescollderungg



# Dala VITA dla CÜRA

## “Paie” Mësses a vis y defunc

Nos cristians se sintiun dër unis ai defunc: tl bun pinsier y oraziun, cun jì te cortina y ciarè dles fosses, cun tra l'ega santa y perié por èi. Cun i dediché Mësses (“paie”) y tó pert, aratunse de podèi i daidé tla miú maniera, ch'ai pois ruvé a bun post y se sté en pêsc.

Dles mësses publicades sö La Pata él le Pro che se tègn ma un n stipendium ( 10 € ) y i atri scioldi vègn dá inant a chi che zelebrièa do chèstes intenziuns. I orun ince se recordé di vis y mèt intenziuns por de vigni sort de bujègns.

\*\*\*\*\*

Por la **Comuniun ai “ziliaci”** dunse ocasiun do debujègn y informaziun.

*Siur Degan*

## Festa de GNISSANT

**Gniissant:** mëssa dales **10:00**

**De dles Animes:** mëssa dales **09:00**

*Por Gniissant sarál chèstes ocajuns da se confessé:*

**Gniissant** dales 08:00 ales 09:00 y dales 17:00 ales 18:00

**De dles Animes** dales 08:00 ales 09:00

**Induliënza:** dal 1 al 8 de novèmber pól gní vadagné na induliënza por i defunc cun vijita ala curta y ales condiziuns conosciüdes.



## Festa de S. LINERT

En domènia, ai **08.11.2015** vègnel tigní la festa de **S. Linert**. Bele dales **09:00** scomència la **Mëssa solena y dedò la sfilada y benedisciun di ciavai y ciavaliers**.

Les èles dala troht organisèia en chël de indò n pice marcé dan Ciasa Runcher. Ci che vègn trat ite vá en benefiziënza a families tla stènta.



**Vademecum por l'organisaziun de na sopoltüra:** sègn por Gniissant gnarál metü fora chësc foliet jö a pe de dl'ija che pó gní tut a ciasa. Al n'è preodü un por vigni familia.

**Rorate:** al é bel sègn da ponsé al Advënt. Por chël periunse i rapresentanc dles uniuns y grups che arjigna ca les mësses di Rorate da gní te calonia por fá fora la data dejiderada, y insciö ince i cors y grups che se mèt a disposiziun por cianté y soné.